

1914

Föstudaginn 29. október 1993.

Nr. 412/1993. **Lúðvík Gizurarson**

gegn

**Bergsteini Gizurarsyni.**

Kærumál. Gerðardómur. Ómerking. Heimvísun. Aðild.

### **Dómur Hæstaréttar.**

Mál þetta dæma hæstaréttardómararnir Guðrún Erlendsdóttir, Garðar Gíslason og Gunnar M. Guðmundsson.

Sóknaraðili skaut máli þessu til Hæstaréttar með kæru 9. október 1993 samkvæmt heimild í 2. mgr. 9. gr. laga nr. 53/1989 um samningsbundna gerðardóma. Hann krefst þess aðallega, að Jóhanni J. Ólafssyni lögfræðingi og Helga V. Jónssyni hæstaréttarlögmanni verði vikið frá störfum í gerðardómi, sem starfar samkvæmt gerðardómssamningi, dagsettum 4. júní 1989, milli hans og varnaraðila. Til vara krefst hann þess, að hinn kærði úrskurður verði ómerktur og málinu vísað aftur heim í hérað til úrskurðar að nýju. Loks krefst hann málskostnaðar í héraði og kærumálskostnaðar.

Varnaraðili krefst staðfestingar hins kærða úrskurðar.

Málavöxtum er lýst í hinum kærða úrskurði.

Fallist er á það með héraðsdómara, að hafna verði kröfu sóknaraðila um, að gerðarmanninum Jóhanni J. Ólafssyni verði vikið úr gerðardóminum á grundvelli 2. mgr. 6. gr. laga nr. 53/1989, þar sem ekki hafi verið gætt ákvæða 3. mgr. 6. gr. laganna um, að formaður gerðardóms skeri úr um ágreining um hæfisskilyrði gerðarmanna.

Sóknaraðili byggir kröfu sína um, að gerðarmönnum Jóhanni J. Ólafssyni og Helga V. Jónssyni verði vikið úr gerðardóminum og nýir menn skipaðir í þeirra stað, á 9. gr. laga nr. 53/1989. Þar segir, að verði „verulegur dráttur á meðferð gerðarmáls sem aðili telur að rekja megi til vanrækslu gerðarmanna á starfsskyldum sínum getur hann snúið sér til héraðsdómara með þeim hætti sem segir í 4. og 5. gr. með kröfu á hendur gagnaðila og gerðarmönnum um að gerðarmenn, einn eða fleiri, verði leystir frá störfum og aðrir skipaðir í þeirra stað“. Í máli þessu heldur sóknaraðili fram van-

rækslu framangreindra gerðarmanna í starfi. Þeim hefur ekki verið gefinn kostur á að mæta í málinu og taka til varna. Ber því að ómerkja hinn kærða úrskurð og vísa málinu heim í hérað til löglegrar meðferðar og uppkvaðningar úrskurðar að nýju.

Kærumálskostnaður er ekki dæmdur.

#### D ó m s o r ð:

Hinn kærði úrskurður er felldur úr gildi, og er málinu vísað heim í hérað til löglegrar meðferðar og uppkvaðningar úrskurðar að nýju.

### Úrskurður Héraðsdóms Suðurlands 5. október 1993.

#### I.

Máli þessu var vísað til Héraðsdóms Suðurlands með bréfi Bergsteins Gizurarsonar, dagsettu 13. janúar 1993. Í bréfinu segir: „Þar sem einn gerðardómenda, Jón Ármann Héðinsson, hefur sagt sig úr gerðardóminum, óskar undirritaður eftir því, að þér, herra dómstjóri, skipið gerðardómanda í hans stað sem fyrst. Eins og sést í meðfylgjandi gerðardómssamningi, er samningurinn óuppsegjanlegur. Þrátt fyrir það hefur Lúðvík Gizurarsyni liðist að koma í veg fyrir, að gerðardómurinn ljúki hlutverki sínu.....“ Í samræmi við bréf þetta fékk málið heitið: Beiðni Bergsteins Gizurarsonar um, að tilnefndur verði maður í gerðardóm“.

Málið var fyrst tekið fyrir 24. ágúst sl., og ákvað dómari þá að fresta málinu til 16. september og beindi því jafnframt til aðila, að þeir leitundu samkomulags um að gera gerðardómssamninginn virkan eða um nýja gerðarmenn. Er mál þetta var síðan tekið fyrir þann dag, varð varnaraðili, Lúðvík Gizurarson, við því að tilnefna mann af sinni hálfu, og var Magnús Thoroddsen hrl. skipaður í því þinghaldi til þess að taka sæti í gerðardóminum.

Jafnframt því að tilnefna Magnús til setu í gerðardóminum gerði varnaraðili nú kröfu til þess, að gerðarmönnum Jóhanni J. Ólafssyni og Helga V. Jónssyni yrði vikið úr gerðardóminum og dómurinn skipaði nýja menn til starfa í gerðardóminum í þeirra stað. Upphaflegur sóknaraðili, sem eftirleidis verður nefndur varnaraðili, tók til varna í þessum þætti málsins og krafðist þess, að þeirri kröfu yrði hrundið, og skírskotaði til þess, að ekkert það hefði gerst í málinu, sem gæfi tilefni til þess, að þeim yrði vikið frá, auk þess sem slíkt myndi tefja málið og hafa aukinn kostnað í för með sér. Var málið síðan tekið til munnlegs málflutnings 27. september sl. um

1916

Þessa kröfu upphafslegs varnaraðila, sem eftirleiðis í úrskurði þessum verður nefndur sóknaraðili. Í samræmi við þetta fékk málið nýtt heiti.

— — —

Ú r s k u r ð a r o r ð :

Hafnað er kröfum sóknaraðila um, að Helga V. Jónssyni og Jóhanni J. Ólafssyni verði vikið úr gerðardóminum.

---